

dubitandi est: cum ab initio longè inferior & minor urbs fuerit Carthagine. De hoc enim loquens Livius ^a ait: *Toletum parva urbs, sed loco munita.* Quid ^a Livius De-
autem Strabo de Carthagine scripserit, & quantum eam super Toletum ex-
tollat modo vidimus. Unde cum Metropoles Ecclesiastica eadem essent, ut
plurimum, ac primariae civitates provinciae cujusque, quin Carthagini honor
ille prius delatus fuerit, nullatenus dubitare valeo. Nec parum favere videtur
Carthagini Euphemii Toletani subscriptio, qui se tantum Provinciae Carpe-
taniae Metropolitanam dixit in Concilio tertio Toletano. At numquid istud
clare testatur ^b contentio inter Toletanum Archiepiscopum & Episcopos Pro-
vinciae Carthaginensis, quorum civitates extra Carpetaniam erant? Hi cum a
pluribus saeculis subjecti fuissent Episcopo Carthaginensi, Toletano, quan-
tumvis huic Reges Gothi faverent, subesse noluerunt, asserentes se ex Pro-
vincia Carthaginensi, Toletanum autem Episcopum Metropolitanam solius
Carpetaniae Provinciae, ideoque nec huic nisi contra Canones obedire pos-
se. His tamen obstare volunt, in gratiam Toletani Episcopi, decretum à
Gundemaro Rege, in conventu, quem pro definienda contentione illa To-
leti anno 610. fieri curavit, editum; & quo dignitas Metropolitana prorsus
Carthaginensi Episcopo denegata est, concessaque Toletano, juxta (ut in eo
dicitur) antiquos Patrum canones, non tantum in Episcopos Provinciae Car-
petaniae, sed etiam in omnes totius Carthaginensis. Decreti verba sunt ^c: *Illud*
autem, quod jam pridem in generali Synodo Concilii Toletani, à venerabili Euphemio
Episcopo, manus subscriptione notatum est, Carpetaniae Provinciae Toletanam esse
sedem Metropolim, nos ejusdem ignorantiae sententiam corrigimus: scientes pro-
culdubio Carpetaniae regionem non esse Provinciam, sed partem Carthaginensis Pro-
vinciae, juxta quod & antiqua rerum gestarum monumenta declarant. Ob hoc, quia
una eademque Provincia est, decernimus, ut sicut Batica, Lusitania, vel Tarraco-
nensis Provincia, vel reliquae ad regni nostri regimina pertinentes, secundum antiqua
Patrum decreta, singulos noscuntur habere Metropolitanos, ita & Carthaginensis
Provincia unum eundemque, quem prisca Synodalis declarat auctoritas, & venere-
tur Primatem, & inter omnes comprovinciales summum honoret Antistitem:
neque quicquam contempto eodem ultra fiat, qualia haecenus arrogantium Sacer-
dotum superba tentavit praesumptio. Certè si Decreto illi credamus, Pri-
matum Toletano tribuendum non Carthagini quis non videt? At mihi tanto
magis suspectae fidei est, quod Hector subscribens Tarraconensi Concilio
Carthaginem Metropolim dixerit, & Euphemius nonnisi Carpetaniae se Me-
tropolitam scribat. Adde quod Decretum istud Carthaginensem Provinciam
eandem cum Carpetania faciat, licet apud Geographos omnino diversa sit:
Hinc enim, an potius ex autoritate Gundemari Regis quam ex rei veritate
editum sit, locus dubitandi est.

Hispalis, quae & olim Spalis dicta est, Hispaniae Baticae Metropolis, diu-
que Gothorum sedes, qui ex ea regum Thronum Toletum sub Lewigildo
rege circa annum 586 transtulerunt. Dicitur alio nomine à Plinio ^d Colonia
Romulienfis. Hispalim autem dictam vult Isidorus ^e à situ, eo quod in solo
palustri, suffixis in profundo palis, locata sit: sed an hujus nominis originem
gratis fingat prudens lector judex sit. Ego hanc Metropolim Ecclesiasticam
fuisse, non tantum ex antiquioribus Notitiis Ecclesiasticis Hispaniae, quibus
semper hoc honoris titulo donatur, sed etiam ex subscriptione Beati Lean-
dri, quae in fine Concilii tertii Toletani sic legitur, probabo: *Leander in*
Christi nomine Ecclesiae Spalensis Metropolitanus Provinciae Baticae, his constitutionibus,
quibus in urbe Toletana interfui, annuens subscripsi. Praeterea cum sedes Regum
esset, totius dioecesis Hispaniarum primaria etiam multo tempore habita est:
hincque factum, ut diu Romani Pontifices Hispalensi Archiepiscopo vices suas
commiserint, suamque dederint auctoritatem in omnes Hispaniarum Eccle-
sias. Id moris antiqui certo probat Epistola Simplicii Papae ^f ad Zenonem
non, Hispal.

VII.
HISPALIS ME-
TROPOLIS BÆ-
TICÆ PROVIN-
CIÆ.
^d Plin. lib. 3. c. 1.
^e Isidor. in Ori-
gin.

^f Simplic. P.
Epist. 1. ad Ze-
nonem.